

四庫全書

集部

欽定四庫全書

集部

草閣詩集卷二

詳校官庶吉士臣龍廷槐

中書臣劉源溥覆勘

總校官進士臣繆琪

校對官中書臣范來宗

謄錄監生臣鄒曾蔭

欽定四庫全書

集部六

草閣集

附筠谷詩

別集類五
明

提要

臣等謹按草閣集六卷拾遺一卷明李昱撰
昱字宗表號草閣錢塘人南雍志作臨安人
蓋錢塘左宋臨安地偶署前代地名非明之臨
安也洪武中官國子監助教昱元季避地永
康東陽間館於胡氏故集中與胡伯宏兄弟

贈答之什最多此集乃昷沒後伯宏及其友
徐孟璣陳公明所輯拾遺一卷則其門人唐
先祖所輯拾遺之後又附雜文四篇題曰文
集不知何人所續輯或亦出先祖之手歟昷
詩才力雄贍古體長篇大抵清剛雋上矯矯
不羣近體亦卓犖無凡語雖為高楊張徐諸
人盛名所掩實則並驚中原未定孰居先後
也未附筠谷詩一帙不著名氏案宋濂作昷

詩序稱其子轅字公載為詩能繼其家千頃
堂書目亦載有李轅筠谷集註為李昱之子
為宜綸縣丞殆編錄者以卷帙無多附其父
後觀詩內有冬至前日侍文讌胡伯奇濟生
堂七言一首是轅作之明証矣朱彞尊曝書
亭集有昱草閣集跋而不言末附筠谷詩或
所見之本偶佚此卷也乾隆四十三年六月

恭校上

總纂官臣紀昀臣陸錫熊臣孫士毅
總校官臣陸費輝

草閣詩集原序

詩之體制雖始於三百篇歷代作者迭加緣飾至李唐而後大備其五七言律及絕句既前此所未有古風歌行樂府諸作徃徃上建建安黃初蓋詩道之盛至是斯極者當是時也惟杜子美李太白為冠絕古今雖以韓子之才而猶稱二公之文光焰萬丈則其非人所及可知者自是以來能詩之士代不乏人終莫能追蹤李杜其間有能悉心探索刻志模擬者則亦各自名家流傳

不泯蓋二公之天才力學所以自得之妙固未易深契
然其律呂可按矩度可尋故學之者真積力久未有不
自成以至可傳者也錢塘李君宗表善為詩精熟清新
氣雄而辭暢一出李杜二家機軸其友天台徐一夔嘗
稱其緣情拈事機動籟鳴無窮搜苦索之態而語皆天
出不煩刻雕不渝盛唐之家法識者以為的論君初居
錢塘少從進士永嘉鄭公僖學僖奇其才以女妻之學
成結草閣居北闕門外若將老焉後避兵金華翔翔東

陽永康二邑間有司常舉上考功奏補國子監助教未幾以病免卜築永康開門授徒與其邑之人士詠觴酬倡以相樂其歿也胡伯弘既葬之魁山之下而其子轅又以瓊州宜倫縣丞歿于官君之詩由是多散佚徐孟璣與伯弘及其友生陳公明相與裒輯得古今詩四百餘篇唐仲進編為六卷將鏤諸木以傳而徵余為序余既喜公之詩又多諸友之義故書此以見君之詩得其師法而用力非淺信有可傳者焉君名譽宗表其字學者

稱為草閣先生轅字公載為詩能繼其家不幸早死士
林惜之楚府長史致仕金華宋濂序

欽定四庫全書

草閣詩集卷一

元 李昱 撰

五言古詩

凡十四首

李杜日已遠疇能振風雅淫哇既紛靡視古氣益下雷
鳴喧瓦缶遂謂黃鍾啞魚目輕夜光鴛駘鄙宛馬獨立
天地間長懷何由寫白雪非不彈舉俗和者寡

人生宇宙間愚哲情與勤年華不可再努力思超羣大

禹寸陰競陶侃惜其分不見東流波晝夜方沄沄吾徒
但飽食與俗同續紛既無良平智又乏賈鄧勲立言著
當代庶以期斯文

穆王瑤池宴八駿爭先之渠黃既電邁騶耳亦風馳舉
觴勸王母回鞭自西陲造父策其勲聲價傳當時顧謂
駑駘輩道坦爾其來日暮路且遙倒行方逆施

鳳凰被五采自顧何歲蕤朝飲醴泉水暮宿梧桐枝虞
廷舞簫韶周時或鳴岐和聲感至治千秋一來儀孔聖

實繼作盛德元匪哀佯狂者誰氏乃獨歌已而

滎河不愛寶龍馬負圖出人丈兆鴻濛列點昭星日皇
覽契玄造俯仰已致密五行妙生成八卦定凶吉大哉
周孔聖以道相繼述雖云六十四萬彙始畫一

夏后承四載胼胝事洪流龜文自天錫大法列九疇皇
極居其中錫福為民休商辛既不極姬政日以脩慙慙
訪箕子彞倫為咨諏至哉君子心傳道非臣周

吾觀詩三百豈徒正而葩其言本情性反覆成詠嗟二

南廼其端列國多淫哇洋洋雅與頌制作功尤嘉善者
固敦厚惡者亦紛拏聖人示我要蔽以思無邪

姬轍既已東王綱日陵替蠻夷遂猾夏諸侯亦專制雖
稱葵丘盛區區假仁義大哉春秋筆斧鉞嚴可畏是非
予奪間立法垂萬世孰云吾道窮經成感麟至

揖遜稱唐虞征誅尚湯武煌煌帝王德簡冊傳千古云
胡巢與山萬乘棄如上采薇首陽巔夷齊獨何苦周衰
逮彊秦併吞猛於虎驅民赴兵戈白首填草莽

江都遊未返豺虎方鬪紫堂堂龍鳳姿舉義揚旗旌擒
充戮建德銑舉不日平功高即帝位貞觀蜚英聲惜乎
晉陽謀兼受突厥盟婚風既相踵敵馬來縱橫

子雲不曉事老厭居執戟法言倣論語太玄擬周易美
新無乃佞意謂伸蠖尺投閣身致危於道竟何益何如
淵明翁敝屣棄彭澤浩歌歸去來南山聳秋碧

白水奮炎祚赤符應天休雲臺二十四烜赫皆封侯富
春有故人物色來羊裘翩然不受爵獨釣滄江流元功

布衣婦所進多嘉猷伊誰秉史筆類與隱者侔

三國既鼎峙髮俊紛如林恭惟諸葛公出處實所欽結
廬南陽卧抱膝梁父吟管樂雖自許伊呂非難任君看
三顧餘驅馳勞寸心奉奉出師表讀之涕盈襟

北難司晨禍變亂五十秋向非張公能唐室幾為周斬
木須斬根絕水當絕流惜哉不及此三思乃見優事機
一以失養患成姦謀崎嶇道路遠竟死誰之尤

古意一首送轅

渥洼有良馬，倜儻飛龍如。遺種落人間，觀者立踟躕。被
以黃金鞍，絡以明月珠。雖非急難才，人謂汗血駒。勉餐
雲中草，養爾八尺軀。勿隨駑駘後，駮駟思並驅。長楸試
天步，真能服鹽車。孫陽儻爾逢，拭目超雲衢。

答呂慎明

清晨聲剝啄，有客扣我扉。車馬何聯翩，林壑生光輝。嗟
予久離羣，屏跡甘布衣。故人金石交，乃肯念細微。上堂
具尊酒，方圓進甘肥。君諒篤高誼，不醉將安歸。攘攘宇

仙分世五之三
卷一
宙間以利相因依交游豈云少所恨知音稀管鮑如可
作茲理儻弗違願為雙黃鸝與子俱遠飛

懷舊一首

齋居秋夜長客子不能睡開門四無鄰皎皎月在地故
人天外書三年袖中字跡踈心每親路長何由至

歲暮懷徐德裕

客居在南山山空歲云莫青陽殘夜逼華髮流年度掩
書坐無聊風燈影回互懷我冰玉人悠悠隔長路孔孟

垂微言夷齊振高步千秋常不厄人能識其故吁嗟宇宙間狂流肆馳驚何由枉巾車相與論幽素

秋夜感懷

秋風吹我衣明月照我床徘徊省中夜感慨祇自傷冥鴻在江渚蟋蟀鳴高堂亦有露草螢隨風恣飛揚物理儻如斯昊穹理茫茫棄置何足云吾將採瓊芳

暮春書懷二首

流光既云邁春事日已深野情嗜踈散奈此違登臨今

晨鼓我琴何以寫素心浮鱗躍清沼好鳥鳴高林微颺
左右至嘯傲以開襟欣欣與物會默默還自任古人亦
已矣後來孰知音

閑居習疎懶歲月漸成癖心幽遠世慮地偏少人跡是
時春向暮芳草萋更碧鳥啼簷間樹花落溪上石悠悠
發長吟命酒聊自適人生任天性焉能為形役

菜圃為鄰畜殘而作

孟嘗久不作吾徒食無魚長齋坐清晝賴此田中蔬僕

夫勤灌溉引水通溝渠青青日已長盡是辛苦餘封豕
從何來荐食良可吁一殘枝蔓傷再則根柢除遂令蒼
翠場轉盼成空虛嗟我在羈旅草野聊暫居惜無樊籬
固悵望徒跼蹐跼蹐將奈何屏棄犁與耜學圃聖所鄙
且讀窗下書

摘豈示轅

山居既幽寂何以娛清晝呼兒啟柴扉共摘園中葢續
紛漸盈把微雨濕衣袖追思菽水奉歲月不可又雖無

然其戒兄弟缺相觀乾坤浩茫茫我獨守孤陋生涯固
云好終焉懷其舊感此成新詩歌之令人瘦

登中臺山

似聞中臺山上有招提境興來每欲往俗事不可屏今
晨登長塗老步困馳騁因之事幽討蠟屐聊為整崎嶇
路百折拄杖穿細嶺颼颼風乍響慘慘日將暝扶持賴
門生乃始登絕頂其居若平地雲生動成景山僧倒屣
迎汲泉為烹茗共談出世法坐對白月影朗觀心地初

爐薰夜方永不待聞晨鐘冷然發深省

發雙溪

我我金華城行李何淹留閏十月初吉始能具扁舟輝
輝晴旭升莽莽寒烟收篙師戒晨發浩嘯嘗弔流握手
謝送者此行實夷猶昔為山林居今作江海遊撫心媿
麋鹿放跡同鳧鷖丈夫既許國生理焉得謀功成纔拂
衣庶以追前脩

泊鷓鴣灣

朝辭婺女城暮泊鷓鴣灣鷓鴣暝不見但聞水潺潺水
聲日西流客子何時還長風吹征衣慘澹生愁顏

泊蘭江

我舟泊蘭江江水淨如練孤雲塵外飛歸鳥鏡中見回
環城數里雜還山百轉何年徐偃王於此建古殿陰廊
斷人跡敗壁留蝸篆題詩感古昔荒哉瑤池宴

過白鴈灘

前途白鴈灘灘聲急如雨扁舟勢逆上百丈難遽舉風

寒雲欲墜冰潔石可數
寒冬景蕭條况我值羈旅
故居日已遠所思在兒女
有鴈不寄書虛名亦何取

宿桐灣埠

蚤歲游江湖倏忽逾半百
偶遂花溪隱山水環我宅
教兒業詩書課僕勤稼穡
投閒未三載又作遠行客
繫舟桐灣埠衣袂帶晚色
風吹野燒紅月照灘水
白舟中二三友相對訴胸臆
夜長不能眠擁被情默默

息灘

息灘復息灘逆上如登天舟行勢齟齬百丈不可牽人
持白木篙左右柱兩肩倒緣凌風檣俯貼衝波舩分寸
累丈尺始能就其顛回頭望來者相去一丈懸我生匪
利涉坦易性所便因之戒行險庶資遠游篇

胡樂站

清晨發崇上四十五里程蕭然見古驛四壁惟榛荆道
傍有候吏倒履遙相迎烹茶坐來久各伸羈旅情更深
始就睡乃聞喧逐聲披衣問如何有虎負豕行

張家灣

扁舟帶晚色小泊張家灣寒光蕩虛碧縹渺冲澗間北
風吹黃蘆慘戚遊子顏區區短篷卧十夢嘗九還須臾
桃花溪咫尺石井山隔枕忽驚覺水鳥鳴關關

丹陽湖

泛舟丹陽湖水鳥何繽紛或飛或飲啄倏忽千百羣千
百亦不盡藹藹如浮雲蕭蕭影自照嚶嚶聲相聞嗟尔
稻粱謀來徃多辛勤漁郎集網罟焉得防朝暉

采石

盡日行扁舟始至采石口
沉沉夜色靜寒波
落星斗憶昔騎鯨人
捉月月在手不知千載下
豪氣猶在否我來賦新作
筆底蛟龍走欲招宮錦袍
樽中惜無酒

揚子江

滔滔揚子江江流日千里
古來限南北今看平如砥
我行屬冬候際此風日美
振拖羣魚驚推蓬一鷗起
須臾棹歌發客子心亦喜
平生濟川心造次聊試爾

姑蘇城

迢迢姑蘇城其勢高百雉古來餘霸習英雄迭興廢一
夫起蹇役遂擅西南利經國無遠圖俄為巨明制憶昨
鏖戰初矢石飛雨至殺聲相交加白骨泥沙棄敵樓今
尚在往事流水逝我舟一經過恍惚如隔世俯仰二十
載風物不可記頭黑今已白感慨夜無寐

嘉禾

晨發嘉禾城晴日舒我顏水深野岸濶驛古秋花斑回

頭指點中已過三塔灣少年所游地頭白今始還沙鷗
喜我還來往清波間願為忘機翁與爾俱投閒

武林

舍舟東新橋徒步北郭門人烟竟蕭瑟往事不復論晨
炊起斷壘秋草生顏垣平生富麗地轉盼成荒村入城
問所交十室纔一存諸生幸頗集日夕具酒尊有兄在
苕川久別勞夢魂那知十五載再叙骨肉恩吾兒渡江
至迎我歸田園田園豈不好况有可抱孫松楸兵燹餘

何以慰朝昏遲行復遲行淚下聲復吞

旅館夢先人覺而有感

先人已云亡哀哀我所思所思不能已中夜夢見之春
風顏色歡手把梅花枝諄諄過庭訓似示夙昔辭顧慙
伯魯昏受簡恐復遺雞鳴星在天蕭瑟回風吹推枕耿
不寐吞聲涕漣漉豈伊道路長冥漠相維持乾坤浩茫
茫江水日夜馳江水亦不息我心永傷悲

遣瘡鬼

汝本顛頊子變化逃其形胡不肖厥祖騎龍升帝青而
為瘡鬼徒屑屑居滄溟復游人間世所在行威靈舌光
霹靂飛怒目張朗星坐令命蹇子狼狽汝所丁其寒誰
致然其熱孰使令淒淒挾絮纒喘喘思風亭肉黃面亦
皴呻吟不可聽巫師用桃菊醫師進猪苓汝常固蟠結
百藝無一寧嗟汝聖王裔區區獨伶俜遷善迺令德肆
虐非常經我今賦新詩送尔揚歸舫東方有蒼龍鼓腹
生雷霆西方有白虎利口惟臙腥赤鳥司南方丹砂耀

脩翎玄武在北方閃目光熒熒四方汝無往恐汝罹天
刑汝宜返故鄉寒泉肅泠泠綠荷以為衣丹霞以為扇
珠簾水晶幌貝闕琉璃屏洛妃奏清曲湘娥荐芳馨飄
飄曳鸞旗洋洋下雲輶速行如風火晝夜不可停從此
勿迴首一去三千齡

宵行效陰何體

纜舟繞晚憇驅車復宵征脩途帶殘夢曉色動微明拭
目近山色傾耳遠雞聲雨過石猶潤岸窮橋始橫屬茲

清秋候迫此羈旅程孤懷雖自慰迢遞難為情

墨梅

烏不涅而黔鵠不浴而白其類雖有殊各以見真色畫師亦何心變幻隨世惑展圖對梅花為爾心惻惻

次韻妻兄鄭伯武見寄

人生如秋蓬飄飄易為別回頭憶往事令我愁欲絕伊昔狼狽初風塵暗南北晨昏但奔走衣帶不得結載揮賈生淚徧歷太史轍西辭吳山青東望越水白是時苗

獠盛跋扈興妖孽我兵氣不揚我馬骨已折賤子復何
為懷玉聊被褐謀生乃盡廢事業安得說結廬花溪上
既耨還復輟平生性鴛鴦鈍屣趾恥干謁維時元運移飛
龍奮天闕大臣方召輩議論甚剴切蒼生免塗炭枯朽
得再活曄也非其才徵書下東浙或談帝王畧從橫吐
胷臆或稽周孔訓輪番侍君側顧慚內空虛衣冠廁羣
哲成均忝司教游藝隨所適風痺忽我嬰形容頓銷鑠
為官既無分上疏乞骸骨歸來對青山及此日未夕別

君二十載憂喜不同域君有子與孫良田環美宅我仍
跡羈栖暖眼惟梨妾長子三十餘讀書僅謀食三孫未
成人頑嬾俱失學三女各有歸織衽喜不拙君年七十
三我近六十七枯楊雖生梯能忘舊佳匹載懷外舅氏
冰清儼人物生死骨肉離情懷為之惡何由上南斗握
手論紆鬱愁來夫如何醉飲酒一石

送轅兒一首

併序

轅兒以文學徵匆匆別我無可言者伏念聖朝憂

老許令一子奉養而吾年已七十闕定省之候救
水之供情見乎辭不能自己云

聖朝御六合治化如陶唐任賢去姦邪綱紀日以張細
材楠與椽鉅材棟與梁嘉謨滿丹陛玉佩鳴鐙鐙府帖
急星火昨夜下永康嗟汝玷儒流乃以文學揚文學本
德行純孝多流芳熒熒爝火微詎禪日月光我今七十
翁風痺臥在床崦嵫既已迫哀颯方自傷齒牙半脫落
頭髮盡已霜况兼左耳聾兩目俱茫茫賴尔營東脯糊

口走四方藜藿供我餐湯藥供我嘗今茲捨我行言及
我淚滂念欲隨汝去十步九步僵汝哭離我膝我愁裂
中腸扶病送出門東風為淒涼吞聲竟嗚咽氣盡語不
長汝行勿我念努力隨忠良所憐三小孫路遠不得將
不如棄溝壑誰與輸餼糧聖朝許侍丁恩波浩洋洋茲
情儻得伸望汝回故鄉

言懷五首

出門多炎埃舉步不可觸野人嗜蕭散所志謝流俗高

齋寂無人當午眠正熟神遊羲皇上夢繞滄江曲翳翳
境初晴勺勺息還續忽覺聞餘聲清風動林竹

郊原生意新靈雨既霑灑賤子携酒醪往餉耦耕者文
章本虛器衣冠亦云假何如務稼穡白首在田野是時
日向暮川色明可把遠林鳥雀聚峻坂羊牛下澹然竟
忘歸悠悠遽難捨獨立臨長風中懷何由寫

魁山一茅茨中有無名氏頭戴鹿皮冠髮白絲不理齋
居了無事危坐烏皮几流觀高士傳放跡心獨喜紅塵

樹外隔清風竹間起俗客不我過其門靜如水嗒焉似
忘我稽首南郭子

今日忽不樂少為川上遊童冠相追隨衣服紛好脩紆
徐既就坂崎嶇亦經丘是時鳴雨餘氣候如清秋怡然
拄孤藤聽此涓涓流往者既云邁來者無時休周流信
無滯至樂常悠悠俗士勿與言永為智者謀

新沐換輕幘振衣坐南軒軒前何所有嘉木陰以繁林
端響靈籟幽趣難具論好風既南至流火將西奔寒暑

互推遷日月相朝昏至人體天運閑居寂無言尼父温
伯雪目擊道已存如何支離子聒耳來喧喧

草閣詩集卷一

欽定四庫全書

草閣詩集卷二

元 李昱 撰

七言古詩

寄太平諸友

昨日東風吹雨過正值山齋罷書課無官可守真自得
有酒不飲誰能那此時况當春夏交綠靜園林安敢唾
出泥已誇籬笋嫩入饌頗憶溪魚大花間紫駟來幾足
葉底黃鸝鳴兩箇桃君諸公多俊才遠來相就同賡和

能文何如揚執戟劇談每羨陳驚座水心風流今尚在
正獻家聲遠猶播伯仁之孫本奇士亦有詩僧兼種糯
埜人擬作韋曲遊諸公復忍東山卧誰謂更深雨復作
到曉打牕驚夢破寧愁烏帽顛風吹尚恐蠟屐春泥浣
拈毫惆悵題我詩天晴更為斯文賀

聚上人鐵筆歌

昔時智永鐵作限今時善聚鉄為筆筆底曾經百鍊功
篆隸雕鏤體非一握波縈迴垂露滾金鵲虎爪相輝光

琅函夜啟玉剛卯笑倒籀史驚鍾王我作中臺山上記
一揮四百二十字聚也運鋒勒翠珉至今矯矯龍蛇勢
草閣巖居雲氣深上人一來聽我吟要將鐵筆化采筆
叢林價重雙南金

贈地理遠碧山

澗東瀍西曾卜洛定之方中楚宮作當時相宅論陰陽
猶未經營到冥漠後來注意馬鬣封某丘某水尋靈踪
封侯作相在頃刻芒鞋踏遍青芙蓉遠師本有降龍技

隨處看山逐龍勢金華一郡凡幾家屢見牛眠得佳地
我家近住東屏山時與遠師相往還青囊和月挂松樹
且酌美酒開心顏我聞金陵帝王宅虎踞龍蟠出竒特
遠師飛錫宜一遊歸來說與漁樵流

送顧仲明之常熟州教授

自從吳中識君面江海相違復相見交情不下十年餘
歲月匆匆若流電尚憶清風八詠樓與君喫酒樓上頭
酒酣借箸為節擊狂歌落日驚沙鷗聞道蘭亭看脩竹

官冷三年食無肉褐袍纔樂柳汁青又載琴書問常熟
此州吳公之故鄉絃歌彷彿聲洋洋孔門政事出文學
坐令州牧成龔黃朝來河雨添春水吳船催發吳歌起
酌君別酒情未已我亦衢州整行李人生離合真可憐
臨行把袂心茫然相期出處各努力淞水東西謾相憶

踏車行

南岸北岸聲咿啞東鄰西鄰踏水車車輪風生雷轉軸
平地雪寒生浪花借問老農何太苦低頭欲語還咨嗟

前月有雨田未耘非其種者紛如麻縣吏捉人應差役
令嚴豈得營私家況當今月滴雨無陂塘之水爭喧譁
雖如抱甕沃焦釜蹄涔豈足供泥沙語罷踏車車轉急
田水何如汗流濕老妻貸穀猶未歸力疾無奈吞聲泣

喜雨行

五日不雨中未焦十日不雨晚禾死農夫田父心煩勞
枯槁捐捐徒為爾俄然雲起從西北一片飛來頭上黑
六丁雷斧開天關不盡天瓢瀉甘澤沛如萬頃之銀潢

疾如江漢流湯湯怒如龍物騰變化颯如白帝行秋光
在坑滿坑谷滿谷此雨何殊雨珠玉甌窶汗耶無復分
但見芄芄稻花熟東家老翁賒酒勸西家女兒賣釵釧
青黃未接渾未憂屈指豐年眼中見我歌不獨如元豐
我歌直與康衢同此身願作飯牛翁耕田鑿井堯無功
嗚呼耕田鑿井堯無功

農家謠

高田低田禾盡熟農家農家生意足腰鎌在手如割鮮

玉粒如山塞茅屋親戚鄰舍懽樂同酒酣社鼓歌老翁
阿孫將米換魚肉老嫗髻插山花紅時和迺由天子聖
元豐之歌敢同盛嗟嗟鼠竊滄海邊胡不賣刀買犢來

歸田

誕日醉吟

先生今年五十一兩鬢雖斑眼如漆挑燈終夜何曾眠
細字蠅頭看書帙既不能握簡起草趨明光又不能搦
旗斬將赴敵場布衣十載困江海空有崢嶸磊落驚世

之文章近來結屋翠峯下白雲繞屋看如畫王侯卿相
不到門自與農夫作鄰舍蠃浮缸面新酒渾清晨上壽
誰稱尊阿兒拜前女拜後此樂欣欣難具論盤餐照眼
復何有出甕黃齏間青韭山田放豚初告脂潑刺鮮魚
貫霜柳須臾剝啄啄叩門急携肴載酒來諸生陶然
洗盞復更酌雖無絲竹管絃之盛亦有鏗鏘澗水和此
颼颼萬壑松風聲松風為我清松月為我明眼花耳熱
不知夜但知百川一吸如長鯨我醉欲眠卿且去謫仙

未得其中趣玉山雖倒嗔人扶染筆從容賦長句我不
願二十四考書中書我不願千二百歲崆峒居但願百
年三萬六千日日日醉吟懼有餘

秋宵七恨

井序

荀卿賦篇於知雲蠶歲之辭始隱而終露又疊以
應之予嘗愛其異偶值秋宵不堪旅次韻成七恨
以為一代之新體云

青蘋葉底聲蓬蓬當年曾號襄王雄秋高八月勢轉急

忽來吹我茅屋東
今夜坐難秉燭使我髮白成老翁

吁嗟恨爾之秋風

風

六月一滴不霑土
連夜淋漓獨何苦
紅蕉碧梧語葉上
黃茅屋漏那能補
雞鳴嚶嚶天欲曙
况廼蕭條在羈旅

吁嗟恨爾之秋雨

雨

嫦娥竊藥奔蟾窟
老兔千年擣何物
玉鏡初從海上來
冰輪又向雲間沒
借問胡為有圓缺
不與愁人照離別

吁嗟恨爾之秋月

月

西風古城夜向深滿牕白月光沉沉羅幃美人勞寸心
雙杵忽傳空外音寒衣不來道路遠丁東落耳愁難禁
吁嗟恨爾之秋砧

砧

伶倫截竹纔過尺一吹能裂蒼崖石况復聲聞折楊柳
對此令人多感激中宵無人萬籟靜天上殘星猶歷歷
吁嗟恨爾之秋笛

笛

疾雷鳴夏風鳴冬秋來鳴者難為容露寒九月入床下
啾啾唧唧羣相從十回歸夢九回斷起坐積憤填心胸

吁嗟恨爾之秋蛩

蛩

洞庭波寒秋影亂幾回相失聲相喚艸木黃落始來賓
頗似人生繫微宦數年寄書長不達應負冥冥在霄漢

吁嗟恨爾之秋鴈

鴈

贈蔡正伯二十六句

石井田邊讀書處好山繞屋青無數尋常俗客不到門
自得平生隱居趣中山蔡君清有餘拄杖衝寒忽相遇
升堂磬折延上座揮麈懸河發談助酌君射洪之淥酒

煨以岷山之紫芋取琴為我彈赤壁如此英雄大江去
起看星斗光闌干天風蕭蕭襲衣屨方今四海頻戈鋌
與君飄蓬同旅寓藤床對月談未了清晨告別何匆遽
惜君豈不苦挽留肯伴山間白雲住豈無鮑叔知管仲
亦有陳蕃下徐孺臨分握手情依依聊復揮毫賦長句
君能別後重相尋記取門前兩槐樹

徐君德裕輓歌

徐君先裔中山人作令來字花溪民至元年間一大治

百里藹藹桑麻春只今相去百餘載甘棠不伐懷其仁
乃知作善天降禎衣冠後代何振振其孫德裕才卓犖
壯年談笑紅蓮幕逸氣稜稜萬里駒高懷矯矯層霄鶴
晚節無心向朝市自識山林有真樂杜門不復趨權豪
竟與時流如朽鑿忽朝議事忤鄉童鑠金織具嬰其凶
鳳陽閱歲歿王事長淮浪險多蛟龍遊魂欲歸道路遠
梧桐葉底隨秋風有子積憤填心胸晝夜號泣呼蒼穹
幾回頓絕欲俱死身着麻衣走千里哀聲欲斷楚山雲

血淚應添楚江水艱難收骨歸故鄉思欲與親雪其恥
一日思親十二時夜卧慈顏夢魂裹卧薪嘗膽仇不忘
綉衣持節來東方揮強扶弱問民苦白筆凜凜飛秋霜
親仇從此獲一雪魑魅魍魎何由藏長塗赫日屋埃黃
行行械繫投邊方鄉中耆舊皆嘆息徐家孝子真難得
老夫聞之亦喜舞為寫長歌相勸激我歌不獨誇鄉閭
要使觀風達宸極君不見孝子即忠臣會見替纓繼前

澤

次韻東坡白戰詩

稚子携壺沽竹葉怪底紛紛亂飛雪
江天雲氣凝不流海間波濤來無絕
支機石殞光欲碎承露高莖凍應折
草中誰憂狐兔死麥根已喜螟蝗滅
天涯客况勝雪冷歲裏光陰驚電掣
吟脾清苦出秀句望眼昏花舒醉纈
誰家洛下閉門戶幾人海上餐氈屑
是非千古冰鑑在榮辱百年風鳥瞥
紛紛狂態安足數炯炯孤懷向誰說
夜深感慨那能眠但覺衾稠冷如鐵

王昭君歌

明妃漢家人自小生金屋金屋花連春晝長東風養得
顏如玉一身願作陽臺雲琥珀枕邊常夢君誰知閨門
跬步地年年草色生羅裙邊城昨夜悲笳起單于求親
漢天子黃金不買毛延壽翻作無鹽畫圖裏畫圖妾貌
兩不同玉鞭催上浮雲驄畫官喜舞天子惜臂上猶存
紅守宮愁雲茫茫天萬里白草離離塞烟紫回首長安
何處家琵琶聲中泪如水單于髮黃雙眼青嗚咿遣譯

通丁寧氈廬寒月射秋夢安得風吹歸漢庭妾身不惜
安邊計婦人豈足揚兵氣單于那知甥舅恩貔貅百萬
能無媿明妃塚前青草肥宮衣化作彩雲飛生無羽翼
度關塞死後魂隨秋鴈歸

北上行送周士約

停君鐵如意飲我金巨羅我有北上行起舞為君歌念
此北上樂君行莫蹉跎披雲登太行敲冰渡黃河黃河
連天與天碧織女大笑投銀梭紅雲暖光開玉闕流星

煌煌夾明月蕭韶之音下紫清太液恩波流不竭去年
前席召賈生今年上書薦禰衡鵬搏虎變不可測布衣
談笑為公卿吾道昌丈夫壯遊須帝鄉紅顏才子青雲
郎文光照曜宮錦裳紫駟馬肥金鞍光蓮花匣出三尺
霜黃金臺高天中央紫琳作佩聲鏘鏘聖主恩深跨陶
唐好賢不數燕昭王北上行君莫忘

東軒歌四十八句為伯弘昆仲賦

酌君東軒酒贈君東軒歌君家之軒甚踈豁分明結構

依巖阿上有魁山之崢嶸下有堰水百折之流波山盤
水繞路不盡地幽往往聞鳴珂軒中有人冠峨峨怡怡
之集何委蛇秋天鴻鴈序偏肅春日棣花陰更多正當
日出東方時陽鳥飛上扶桑柯層軒面面皆陽和六龍
銜耀青天過伯氏仲氏吹塤箎叔也季也能同科况君
有母壽而康兩鬢不着秋霜皤友于奉觴更上壽綠酒
微覺朱顏酡臨軒手把東皇衣願求齡永福且那谷風
東來射花柳海月東出穿松蘿東里先生嘗叩門鳴玉

曳組肩相摩或工苦語似東野或騁豪句如東坡種瓜
或作東門遊賞菊或向東籬哦西山朝來恰對我拄笏
雲氣相噓呵村南村北亦有隣或荷農笠被漁蓑此軒
實為東道主賸有人物如星羅嚶嚶黃鳥鳴高枝娟娟
白鷺浮盤渦歸鴉或棲雪後檜游魚或觸風前荷有童
慣養尸鄉雞有客共玩山陰鷺草閣道人投東來開軒
延飲黑日間婆婆琅玕錦綉不足報但寄詩筆懸長河

題王子榮主簿所藏醉猫圖

涼風晚香吹芟苛狸奴咀之酣且卧金睛不動尾鬣髯
翠屑闌珊落餘唾眼前黠鼠紛如雲白晝從橫喜相賀
翻盆攪甕任汝為草性須臾如酒過奮鬚一攫何所逃
腥血空令齒牙浣黃筌老手妙入神安得徧示寰中人
嗚呼安得徧示寰中人

羸輓車圖

車轉轉車轉轉羸輓車輓斷筋借問何辛辛一家骨
肉在一身紅絲繫足非良因彩衣兒女徒欣欣載重力

微每見嗔鞭之扑之亦有因嗟哉髑髏之骨已如銀髑
髏之苦如積薪髑髏入土還笑人後車來者無停輪

九鷺圖

何人水墨開毫素白日晴牕起烟霧強將醉眼窺微茫
乃見江南九秋鷺兩隻長鳴一隻飛兩隻共啄菰米肥
其餘四隻夢洲渚黃蘆白葦相因依我家曾住芑洲上
綠蓑披雨聽漁唱西塞山邊今有無桃花流水應新漲
別來幾載接林巒身欲奮飛無羽翰卷圖高詠風漢漢

憶爾磯頭青釣竿

狄仁傑諫復廬陵王圖

金戈玉戚平四方英雄只數唐
文皇惜哉龍飛起晉陽
婚風相繼流餘殃北雞之晨
及其常天樞崇崇勢莫當
壘也居然垂袞裳竟以袞姐
談虞唐鸞臺鳳閣遙相望
合置杞梓羅圭璋翩然木鶴
來求凰吹笙子晉儼在傍
雲牕霧閣事渺茫妖狐遂闕
東宮墻嗚呼仙李根摧傷
存者僅有廬陵王狄公正笏
持朝綱直辭凜凜生秋霜

神堯大器安可攘儲君不復我涕滂沒身事付桓與張
虞淵日落回重光瑤圖三百漢共昌至今青史傳芬芳

嘲鳩三五七言

雙鶉鳩毛斑斑陰雨逐婦去晴天呼婦還嗟哉爾婦良
不易愛憎只在須臾間

處女吟

深閨有處女盈盈好顏色施朱太赤粉太白畫工如山
貌不得年逾三十不嫁人蹇修塞門守愈真清晨去來

山上柏願以苦節終吾身東風吹綠階前草蝴蝶雙飛
一何早長門白日苦花多人生只似花開好東家小姑
嫁大官錦靴笑坐黃金鞍一朝失寵如敝屣鏡中孤影
愁離鸞西鄰小妹嫁豪賈聘與黃金賤如土失身乃在
江海間夢魂長怨風波苦何似深閨處女吟許身真比
雙南金寄聲小妹小姑道嫁人容易紅顏老

吳將軍歌贈邁善鄉

吳將軍天下雄目如朗星氣如虹平生讀書不怕死惟

有秋霜烈日皎皎是孤忠曾攀丹桂枝飛上銀蟾宮紫
皇賜以白兔藥令將軍起民彫瘵蘇愚蒙去秋蝮蛇從
西來渡我淞水東磨牙白參差吮人肌血豺虎同將軍
躍馬如遊龍笑持三尺莫邪鋒劍虵之腹馘蛇首魂魄
散亂隨秋風又聞括蒼山千疊萬疊青芙蓉山深狐兔
作人立火雲獵獵旌旗紅將軍手撚鉄絲箭腰挂麟膠
弓竟從荒茅野草入一洗妖媚無留蹤民無居將軍墉
民無田將軍農秋田滿眼春芄芄賣刀買犢期年豐夜

來過鼓聲籠銅乃是將軍奏凱歸越中越中民喜且雍
走白叟歌黃童牽羊載酒遮道迎我詩書禮樂之元
戎有母有母垂霜蓬升堂百拜懼動容有兒為國立大
功忠孝一心天感通烏臺卓立高崇崇薦章如雲達九
重九重日月光重瞳墨書蚤晚來徵庸噫吁噉吳將軍
安得如公數十輩落落棋布嚴提封

鴻門舞劍歌

鴻門大將輝重瞳虎視六合無英雄當時灞上隆準公

摧眉俛首趨下風青虵光寒射尊俎酒酣拔劍為誰舞
一舞范增身若雲再舞張良面如土神鋒慄魄可奈何
喚取楚人歌漢歌當筵對舞張羽翼紅烟紫電相盪摩
須臾舞罷沐猴悅亞父翻成背流血玉玦不靈玉斗裂
楚漢雌雄從此決

月氏王頭飲器歌

北風吹寒地椒短捲毛綿羊尾脂滿國王愛飲蘆酒漿
鑿刀巧削玻璃椀玉窪雲氣蒸髓紅神光欲裂泥丸宮

血魂騭面訴上帝怒鯨倒吸銀河空紫檀琵琶作怨語
彩姬如花踏筵舞豈知雛骨填糟丘鬼馬悲鳴草根雨
湘鬼髑髏空獨醒劉伶墳上苔花青何如將身製鸚鵡
生死不離雙玉瓶

胡將軍歌

胡將軍邦之良武之豪身長八尺面如鐵敵人見之凜
凜生寒毛憶昨辛卯歲九州沸鯨濤蒼生日塗炭呼天
雨泣何嗷嗷吳王氣宇真天人手提秋水三尺之豪曹

貌貅萬竈會滁上左右環列俱賢髦將軍謁轅門開口
談六韜為王之爪牙出入行陣躬鞬索澗江江水流滔
滔疾如風雨飛十艘王命胡將軍螯弧螯弧爾所搃義
聲西來動白日電光閃爍搖旌旄金陵宣城不日得徽
州巖郡隨風逝洞兵三萬餘及鞘弓藏弣靈旗却指金
華城父老爭先將酒烹喉衿闔楚信州地將軍又為殫
力營城壕迺從元戎上台鼎橫金拖紫獨立青雲高將
軍未下車民庶憂忉忉將軍既下車所犯無秋毫健兒

不敢忤民意酷吏不敢搜民膏男兒務農耕婦女勤蠶
繅將軍為之垣墉使生厚民適自樂將軍勞兇螫貂蟬
本無異擬變方名為夔臯嗚呼壬寅春二月肘腋禍所
遭三軍盡躑躅萬姓皆號咷朝廷聞之為痛惜遣中使
降丹詔遂有光祿大夫越國之崇褒有廟有廟依巖毅
春秋二時祠太牢吹笙鼓瑟兼伐磬玉盃春酒釀蒲萄
畫梁文拱倍輝赫焚香彷彿來君蒿英姿颯爽毛髮豎
陰風吹動團花袍殿前近侍捫錦條壁上先驅腰寶刀

出師或銜枚班師或鳴鼗將軍雖死有餘樂魂魄上與
星辰遨有子有子如將軍志欲與國除麼么鄰敵侵我
疆勇捷如飛孫奮身與之戰以一當百戰已鏖將軍陰
兵實助之似聞人馬聲嘈嘈敵驚靈火徧原埜如中羽
鏃相呼號我來祠下謁遺像秋林葉落風蕭騷雄丈大
字紀顛末翠珉已載黃金鼇翠珉已載黃金鼇嗚呼胡
將軍將軍生為名臣死廟食將軍之死猶未死嗚呼勸
忠之作吾其叨

二喬觀兵書歌

古來尤物多嬌美家國傾危始于此綠珠樓前紅粉空
馬嵬坡下花鈿委何似喬公之二娃髮雲不鬢濃如鴉
傾城顏色何足羨過人才慧真堪誇深院無人春日好
不綉鴛鴦被情惱臨風並倚雙頭蓮手把兵書細論討
大喬已作孫郎妃小喬又作周郎妻設機制勝妙無敵
誰謂頗牧生深閨曹瞞提兵來赤壁千里旌旗蔽雲黑
水軍百萬將奈何吳下衣冠俱失色小娃衽席能運籌

飄飄殺氣橫清秋
綸巾羽扇風采發
偉哉公瑾來舒州
北軍怕見南風起
烈火齊燒舳艫尾
孟德零丁匹馬逃
檣櫓灰飛付流水
滔滔巨浪高如天
敵人不敢來戈船
乾坤從此限南北
盤渦鷗鷺成安眠
婦人自古無專制
畫師故寫圖中意
趙括徒能讀父書
堂堂八尺能無愧

徐原父畫梅歌

座客且莫誼聽我
梅花歌古今畫者
豈不多俗工柰此
幽絕之花何花光
道人得三昧標格
孤高出塵外後來

繼之復何人畫師斂手看前輩湯叔雅楊補之我嘗按
譜搜瑰竒或如蜂腰繞屈幹或若鶴膝行高枝或如蟹
眼競的皜或若兔耳相參差陰陽向背合造化攢三簇
四何歲黹眼看變態不可測記一忘百空爾為寥寥數
百年寂寞江村樹乾坤盡埃塵伊誰重毫素人間不是
無梅花無人識得梅花趣山陰老王腹如蠶能寫千朵
萬朵之繁葩權門挾勢求不得徘徊悵望扼腕生咨嗟
九里山中草堂窄手種梅花動成百有時正紙戲作推

蓬圖老幹新捐隘春色尋常更有梅花船繫在鑑湖之
濱柳姑之廟前夜半酒豪詩興顛逸湖撐徧十頃玻璃
天金華徐君亦有梅花屋終日關門媚幽獨西湖東閣
座上親庾嶺羅浮眼中熟三年落筆始一揮觀者已覺
心神飛達官名流得真跡珍藏篋笥生光輝有時寫墨
梅蕊玄霜點注雪色紙三十六宮貌如玉風流却讓崑
崙美有時作紅梅花鵝溪綃上碎染天台霞艷如玉環
醉夕酒炯如姑射餐丹砂有時畫釣潭影橫枝下浸滄

波冷老龍巖，聳蟠水鱗。夜半熟眠呼不醒，有時畫出牆。
稍學尹玉氣，春風清佳人。日暮翠袖薄，獨倚脩竹當林。
劫有時，寫雪後容清絕，但無比。玉癡數點春，自生鉄骨。
一梢僵不死，有時寫風前景滿地。還飄零，粲如魚鱗，嗅
不腥。紛紛點破莓苔青，有時或寫烟中骨，彷彿傾城在。
林樾隔幃，遙見李夫人燈下玉容，終恍惚。有時或寫月
下魂，巫陽招得來，黃昏縞衣能歌綠衣舞。月落參橫何
處村，王君筆底縱橫處，意匠分明與神遇。遂令海內人

題詩碎錦零珠不知數憶昔君嘗求我吟一別風雨江湖深十餘年來乏佳句今日為君勞寸心許壇高築臨無地立呼四友來參侍前驅陳玄後陶泓楮生毛穎還同至山根水涯開幾株南枝北枝春有無搜梅之精摘梅髓舊懷新賞成須臾金華之山鑑湖水山有奇峰水清泚王徐寫梅伯仲間况復清高亦相似王也騎龍叩天關五雲之中喚不還平生畫梅得真訣置在二十四風花仙之上班徐也少年今白首能事無能出其右世

人喚作梅花徐賸有香名吹不朽何水部杜拾遺老夫
賴爾相提携尋花索笈往何所夢中着屐行春泥豈不
聞凌風之臺邵月之觀歲莫之傷春愁之亂二老迺是
詩中豪其餘作者李與桃桃紅李白徒爛熳風韻豈似
紅梅高林逋處士請回駕暗香踈影非真畫畫本無聲
詩有聲詩人幾許浪得名我欲尋君牧羊洞自取瑤琴
作三弄復念人間知者希梅梢月色誰能共三弄亦不
盡離思紛如雲問天乞借驪珠一千顆置在白玉盤中

持贈君贈君君莫違什襲當愛惜詩因君畫始霽霈畫
得吾詩倍輝赫朝來隱几已忘言更向孤根尋太極花
神有靈應笑我此翁也有梅花癖老翁之癖因作歌苦
被風騷互推激湛盧豪曾歐冶重綠螭紫燕孫陽識我
歌不求衆口誇我才不倚千夫敵但恐為花漏泄春消
息花神上訴天為嗔六丁下取飛霹靂

東白軒歌

郡侯軒子名東白邀我題詩寫胃臆自言曾客京華東

慣識東方五更色天上雞人唱曉籌青宮問寢當龍樓
午門萬戶啟金鑰宵衣聖主思嘉猷左右衣冠盡台輔
獻納論思出肝脯螭頭不動香烟高蝦須漸捲晨光吐
太學讀書燈火深承恩作薄花溪潯九重堯舜尚憂惕
承流宣化當勞心殘月輝輝太白閃雞聲三唱更五點
夜如何其夜向晨面視東方色容儼東方未白思明光
東方既白瞻扶桑有時顛倒衣與裳簿書期會亦琴堂
坡仙赤壁曾題賦亦有當年東白句枕藉舟中何足論

豈似君家所扁之小軒

海棠留春鶯歌倣長吉體

環奴本是傾城女帝遣花中作花主玉手親將金剪刀
剪碎錦江三月雨猩魂入夢流妖芳翠紗夜燒紅蠟香
雙鳥綠衣黃作裳聲聲苦欲留春光青皇馬嘶芳草路
胭脂欲捲東風去畫師却倚中山免留在華堂最深處

子陵釣魚圖為胡伯奇題

光武龍飛膺赤伏臺上功臣三十六先生底事披羊裘

脩然獨釣銅江曲嘉謨啟沃當龍潛已令漢火回炎炎
三公之棄如敝屣一絲引得貪夫廉但知文叔同衾卧
不知客星侵帝座先生之風千載那能忘雲山蒼蒼江
水長

題烟波疊嶂圖

憶昨扁舟上南斗順風看山如馬走前山在眼後山失
紫翠繽紛落吾手當年見山如畫圖畫圖得似當年無
臨軒把玩笑絕倒蚤覺詩思生江湖江風蕭蕭烟水暮

盡日漁翁釣魚處安得身輕如白鷗江上飛來又飛去

題胡濟源聽泉樓

戊戌前作

冷泉亭子深且幽我昔杖履曾追遊山中正當朝雨霽
坐聽泉水涓涓流初如松風洒萬壑忽如仙佩鏘鳴璆
又如蛟龍起潭窟霹靂閃電摧林丘黃猿抱子掛秋影
欲下不下聲啾啾是時同行四五人相對毛髮寒颼颼
乃知福地難久住却載酒壺登綵舟故鄉一別幾十載
江湖浪迹隨沙鷗風塵頭洞箭滿眼欲歸洗耳嗟何由

飛來山色入我夢，碧松丹桂枝相樛。每逢泉石必宿留，
題詩感慨無時休。胡君亦是聽泉者，曾次磊落非常儔。
何當暇日登君樓，與君作記樓上頭。

題鍾馗移家圖

綠袍進士掀怒髯，饑來嚼鬼如蜜甜。酸風苦雨攪白日，
移家欲往陰山尖。隨兄小妹臉抹漆，眼光射人珠的皦。
鬼奴鬼妾千萬形，蟹怪猫妖最蕭瑟。勢能使鬼鬼不違，
髑髏在後唾鍾馗。英雄如山堆白骨，莫倚區區手中笏。

題陶淵明歸去來圖

典午渡江江水竭寄奴小草當春發先生太尉之子孫
管謝之間見人物先生志在義熙前先生道在羲皇先
北窻清風湛如水閒來一枕供高眠彭澤之衙大如斗
雲出無心亦云偶鄉里小兒稱上官辱我門前五株柳
有田將蕪胡不耕無官見縛身始輕掉頭一笑賦歸去
浮雲富貴非吾情扁舟遙遙颺晴綠咲指吾家舊茅屋
門首歡迎拜僮僕三逕依然對松菊黃菊黃菊當我軒

濁醪濁醪盈我尊
須臾爛醉喚不醒
昨非今是何須論
田夫農父邀皆去
共坐田頭話農務
阿舒尔等休讀書
讀書要被文章誤

青山白雲圖

若有若無青山之嶙峋
欲斷不斷白雲之氤氳
往時何人得此意
彦公彦敬下筆藝絕倫
我歌紫芝白雲裏
白雲却向青山起
裁雲為吾衣
推山作吾几
松花釀酒三千石
醉後高歌歌未已
歌罷仰天笑
此樂人中仙
心搖

赤城霞日斷蒼梧烟左執容成袂右拍洪崖肩五雲之
佩何翩翩乘風欲往蓬萊巔蓬萊巔渺何處金銀樓臺
隔烟霧青鳥銜書海上來千歲胡麻欲成樹悵不往兮
心茫茫雲浩浩兮山蒼蒼人間亦自有真樂還君之圖
兮贈君青山白雲作

題五馬圖


開元四十萬匹馬誰是超然出羣者曹韓筆刀非不工
須信真龍最難寫真龍只有拳毛騮太宗騎此開唐家

雄姿猛氣世無敵當年識者久歎嗟吳興公子畫五匹
滿眼風雲起蕭瑟一匹玉花嚙且驕一匹飛黃甚飄逸
駁文殊者一匹雄一匹紫電奔長虹中央正立一匹胡
青驄遂令四馬皆下風想見承華春首着此馬由來字
天育殷紅盤袍帽紋縠奚官秋策采監牧花萼樓前風
日遲五王宴罷何逶迤乃知畫師用心苦俟我落筆題
新詩大明天子飛龍騎汗血功成即天位真龍復出凡
馬空眼見此圖傳萬世

送胡李誠北上

杭州從事真文儒迺是丹山九苞之鳳雛
春風蕤蕤開玉樹明月皎潔涵冰壺
伊昔跨馬遊京都翩翩彩服親庭趨
太常博士衆所敬儀表自與常人殊
嗚呼耆舊今已無空餘故宅臨東湖
嗟余避地頗相近不得再見成長吁
山中六月火雲熱多君為我來肩輿
衣冠如覩太常而令我舊事懷姑胥
自註昔與李誠尊翁古愚先生會于楊廉夫姑胥寓舍呼
兒出為佳客拜遣僕往問香醪沾黃雞
啄黍或可餉青

非剪雨時堪須夜深秉燭忘夢寐脫巾且挂長松株酒
酣慷慨肝膽露駕言欲問青雲途飄然挂席上北斗海
濤日出扶金烏觚稜翹首天咫尺五雲深處陳嘉謨先
公餘澤猶未已青檀故物還須臾青檀故物還須臾此
行善保千金軀



草閣詩集卷二

欽定四庫全書

集部

草閣詩集卷六

三至六

詳校官庶吉士臣龍廷槐

中書臣劉源溥覆勘

總校官進士臣繆琪

校對官中書臣范來宗

謄錄監生臣鄒曾蔭

欽定四庫全書

草閣詩集卷三

元 李昱 撰

五言律詩

送劉原善赴浙東

金陵城下路送遠意無窮
水淨平沙合天寒埜草空
都趨新入幕桓典舊乘驄
廿載經遊處憐余感慨同

次呂慎明見寄韻

月白疑無地樓高欲近天
綠尊拚永夜華髮惜疎年
見

憶新詩句招遊舊釣船何時共幽隱因注馬蹄篇

楊仲彰見訪次韻

十月荒山道煩君着屐來出詩多舊作行酒只新醅不
負陳雷誼兼誇鮑謝才雙株紅樹下臨別更徘徊

答蔣仲啟

自別南溪友海雲天際多如何屢有約不見一相過
逕深紅葉茅簷長翠蘿詩篇空漫興把酒共誰哦

九日懷智上人

九日今朝是相期亦未能簪花憐病客把酒憶高僧
河雨舟難買山雲檻屢凭裁詩坐草閣極目盡漁罾

早春言懷

客懷誰與適偏是早春時紅點溪桃萼黃垂岍柳枝
無官能縱酒有子可言詩此外皆餘事神仙亦浪期

春懷

戊戌後作

信是春多雨村村水接連荷蓑黃犢外倚杖白鷗前
既足供詩句何須乞酒錢古人應念此動即賦歸田

少隱烏皮几羣書且罷看客懷燈下集春事雨中殘湖
柳藏歌棹山花拂馬鞍如今歸未得道路正艱難

幽居

幽居似畫屏詩句滿柴扃水繞籬根白山連瓦縫青無
能治安策有分太玄經埜老時相過應期煮茯苓

村居

村僻無人到安居似野僧柴門交岼竹茅屋帶溪藤煮
粥宜襟稻分茶間老菱百年堪樂此生計日相仍

雨後過畦

十月晴宜雨
芄芄野菜新
皇天無棄物
生意頗如人
落筴銀絲滑
傾筐翠色勻
盤餐亦多品
不信庾郎貧

田頭

莫怪田頭望
幽懷未易論
詩題隨處處
農務自村村
鷺點青山破
牛耕白水翻
出門無半里
歸路任昏昏

夜歸

野翁爭席罷
歸路又昏黃
步繞陰崖險
衣飄積水涼
高

枝纔宿鳥哀草更鳴蟬因憶陶元亮田園興不忘

宿田家

薄暮投何處田家白板扉雞棲留客久犬吠見人稀
破壁風威勁頽簷月色微夜深燈火亮猶織木棉機

十月農家

山塢孤村路農家十月天把茅遮舊屋燒土作新田
瓶有儲留粟官無橫索錢舉家雖不飽隨分過今年

山行

山路得秋晴
籃輿重亦輕
野花留客艷
沙鳥去人鳴
岩脉交重險
灘流合細聲
若於詩句內
紅樹最關情

雪後山行

雪後春泥滑
籃輿款作程
山從岩罅出
雲向樹頭生
路遠勞行役
心幽愜物情
茅茨深處見
因有午雞鳴

出門

出門經過處
將身入畫圖
浪花吹石碎
松樹挂藤枯
遇勝憑詩答
乘危信杖扶
酒醪何處有
不吝十千沽

發鹿城

江上潮初落好風吹客船
孤城辭白鹿小縣入青山
氣晴疑雨灘聲斷復連沙
鷗休笑我詩思正相牽

過荷葉浦

雨後乘船好春流處處
渾買魚荷葉浦沽酒杏花村
野景蒼茫過清詩仔細
論磯頭雙白鷺相對似忘言

茶源

晚向茶源過淒涼不可論
孤舟千里客茅屋數家村
雁

落平沙淨鴉棲返照昏唯應愜詩思坐久愈忘言

宿新安驛

一宿新安驛迢迢夜未央有懷投赤縣無夢及滄浪土
榻連苔色風簾帶月光清晨聞鐘鼓民俗祀汪王

績溪

落日銜孤嶂行人到績溪野橋通岍窄茅屋隔林低邑
古民還聚官清政不迷小亭幽絕甚足以慰羈棲

宣州城外泊

宣州城外泊古樹已棲鴉客路三千里人煙八九家
爐煨霜後粟瓶煮雨前茶深夜延清話惟頻剪燭花

水陽夜舟

遠客冬行處孤舟夜發時帆風轉羊角檣月帶蛾眉道
路詩中見家山枕上思得歸開篋笥一一示吾兒

山寺

碧水流千轉青山繞百層過橋隨小僕入寺遇高僧石
洞深連樹茅簷倒挂藤何時借禪榻清夜看傳燈

春行得驢字

戊戌後作

春行樂有餘况有酒尊俱綠樹雙啼鳥青山獨蹇驢他鄉真自得故里近何如賴有能詩友清談數起予

十月郊行

連日小齋閉出門幽興多青山雲外斷紅葉樹頭過叢篠羣飛雀晴漪並浴鵝吟餘真自得詩法到陰何

出郊

風雨閉門久出郊晴可憐人行深樹裏犬吠落花前白

屋通樵逕青山壓釣船分明在圖畫許可廢詩篇

冬行得邊字

冬行雖寂寞詩句總堪傳紅樹行人外青山去鳥邊醉
防歸路險老覺杖藜便牧豎休相訝衣冠本晉賢

雨過許叔大

山雨霑衣濕江雲度水寒也應如杜甫曾此過蘇端綠
蟻春將粟甕青絲野菜盤平生謝拘束與子罄相驩

宴許晉仲清暉亭

為客開幽徑臨流坐小亭水雲浮檻白埜竹過簷青勝
絕詩難賦涼多酒易醒清暉安足擬堪草太玄經

八月二十五夜陳世恭邀賞桂花

中秋過十日丹桂始堪誇浸酒嘗花味張燈代月華舊
遊人頓少遲賞興尤嘉謔笑從狂客清歌欠小娃

愁吟

乾坤雖浩蕩無處着愁身早識文章誤甘於盃酒親埜
花他自好江燕肯來頻笑從狂客鏡猶誇黑髮新

夏夜

涼宵常苦短，獨客况無眠。
風物雖殊壤，星河却共天。
銀槎渾不到，玉宇尚依然。
細數離鄉日，蹉跎又六年。

無眠

冬夜寒於水，無眠似不禁。
江湖為客久，雨雪入年深。
茅屋疎還漏，新詩穩更吟。
家書何太少，五月到如今。

冬至

客裏逢長至，山中習短吟。
陰陽爭晝夜，日月繼升沉。
人

共梅花老春隨竹葉深綠知沉醉後翻動故鄉心

除夕

去客猶為客今宵喜有家喚兒行綠酒教女戴春花自
喜新正近誰憐暮景斜題詩逐窮鬼無用柳為車

端午得江字

五月榴花雨生涼到北牕盤行金粽九人醉玉瓶雙黑
髮雖云改丹心尚未降詩成感今古因弔汨羅江

九日思歸

九日景偏嘉登高至日斜杯傾新釀酒籬發去年花白
髮人占鵲滄溟客泛槎異鄉還醅酌行坐只思家

喜雨

雲氣流天濶雷威積雨深未秋何颯颯入夜轉沉沉多
稼蒼生命豐年逆旅心道逢農父說如落萬黃金

夜雨

睡美不聞驟夢回方覺寒因驚五月到只作九秋看田
野新茅屋江湖舊釣竿幽懷誰與共剪燭坐更闌

對雪

冬半纔飛雪紛紛近酒尊
惇明疑白晝衣冷覺黃昏
有興須乘棹無求只閉門
幽居轉瀟灑詩思滿江村

題林和靖祠

處士當年住西湖正繞門
詩名因不死祠宇到今存
鶴可充童僕梅堪替子孫
淒涼斷橋路纖月照黃昏

題子陵釣臺

漢祖龍飛日先生釣澤中
布衣曾友道台鼎不償功
七

里灘頭月一絲亭上風古今評論者只作隱淪同

海棠

分明守宮血帶露染初勻上苑移根晚他鄉照眼新賦
誇詩似錦替愧髮如銀寂寞東風裏看花憶故人

螢火

流螢何太苦秋至亂階前傍月星偏密隨風火自然吟
懷空夜夜歸計又年年縱有尊鱸興滄江何處船

秋扇

賦性如霜潔將形似月圓暑中誰不愛秋後獨堪憐才
士名難遂佳人色易捐清風終有在藏篋待明年

聞鐘

古寺路幽深洪鐘發妙音隨風傳寶閣送月出珠林江
海燈前耳乾坤句裏心人生幾昏曉勳業二毛侵

酒醒

酒醒中宵立題詩興轉幽風聲吹雨歇雲氣帶星流日
月雙飛鳥乾坤不繫舟歸心與潮水常寄故鄉愁

獨客

竹裏殘僧寺松邊獨客樓
溪聲常認雨山氣只疑秋
地僻從交絕身閒與道謀
如何蘇李子塵滿黑貂裘

晚歸

小徑雖微黑斜陽已淡紅
吟懷方冉冉歸興莫匆匆
野寺蒼茫入山田曲折通
欲行猶未忍少立石橋東

挽魯生蘭石

天育名駒骨丹山彩鳳毛
聰明人盡許短折爾難逃
書

廢塵生架弓閒蘚上歎空餘玉堂老淚雨漲江濤

夜坐

倣孟浩然

亦知今夕好無地著塵埃人在月下坐風從樹裡來對
巢棲鳥定照影去螢回更道襄陽叟清詩解品裁

守歲

歲事雖云盡吾生自有涯送窮車縛柳報喜燭生花京
國當年客山林著處家詩成猶不寐拚醉酌流霞

嘲雪次胡叔敬韻

一冬無雪落正月始花飛未足成和氣唯能作冷威飄
飄欺雨重浙浙弄風微村舍多貧餒陽春未解圍

晚作

落日紅將斂牛羊早下來好詩閒裏得幽抱靜中開已
定禽棲樹無驚犬卧苔坐忘心似水無地著塵埃

曝背

愛日經簷處終朝曝背時興深隨境入情益與春期草
木應同惠乾坤亦自私由來至人樂未許俗流知

魁山除夕

除夕逢今夕驅馳感鬢華
歲添新歷日身寓故人家
春暖爐燃炭更長燭剪花
從今謝拘束詩酒作生涯

訪俞光大山居

立春纔五日同訪隱君家
崖石昂如馬田塍曲似蛇
詣幽詩緩得扶倦杖堪誇
為憶山居好留連至日斜

寄胡伯弘

造物還同戲為人不願才
如何麟趾厚翻受鼠牙災
萱

草春猶茂荆花晚正開時清無滯獄行李好歸來

贈胡叔敬

去作隨羣雁歸尋返哺烏難兄雖落寞慈母且歡娛夜
雨花銷燭春風蟻螫壺談詩多近橐亦得慰潛夫

秋日感懷

暑盡瀟瀟雨涼生浙浙風朝來一葉落秋至萬家同昔
日紅顏子今晨白髮翁卜居猶未遂感激寸心中

東軒雪中宴集分韻得無字

不合三冬暖長疑片雪無清晨忽撩亂薄暮轉模糊縱
飲從諸友愁吟只老夫空林寒悄悄貪看哺巢鳥

秋興二首

天末秋風起新涼日漸多故園今已矣歸興欲如何愁
至將詩遣狂來對酒歌扁舟猶在眼木落洞庭波
地勢環龍虎天文應斗牛由來賢達士多集帝王州方
召輸戎畧臯夔獻治謀老夫才不敏有分在林丘

木棉絞車

鐵軸橫中竅，檀輪運兩頭。倒看星象轉，亂捲雪花浮。
人力雖施巧，天機不自由。最憐聲過耳，柔櫓下中流。

徐孟璣斗室

一室寬如斗，危墻穩似船。座中疑縮地，壺內別為天。
北海尊常在，南州榻自懸。曲肱雖樂甚，容膝已安然。

草閣詩集卷三

欽定四庫全書

草閣詩集卷四

元 李昱 撰

五言長律

聞人夢吉輓詩十韻

鄉選聯科目儒官領縉紳橫經數十載負笈二千人業
與河汾並名將稷下鄰繡衣徒薦剡朱紱懶縈身踐履
追前輩光輝振後塵丹丘鳴鳳下滄海泛鷗馴宿草經
長夜飛花落晚春泗山環馬鬣鯉水戲魚鱗最憶凝熙

諡還勝貞曜倫斯文日陵替執筆為酸辛

輓朱留耕十二韻

養譽能超俗延齡似得仙風生談滿座霜染髮垂肩錦
里青山外金城碧水邊誰誇五牖富正愛一狐賢曉句
質營谷春蓑擺楫田躬耕疲不厭力學老尤專豈謂迎
申日俄驚在巳年蒲輪何寂寂草帶已芊芊惆悵蓬科
地淒涼薤露篇緋多親友執書有子孫傳去去隨長夜
冥冥隔九泉惟應忝鄰好回首涕潸然

牽牛織女

佳期逢七夕星駕不須邀
河鼓臨牛渚天孫度鵲橋
氣隨涼雨集心與彩雲飄
今古十年恨東西一水遙
服箱輝列宿鳴杼颯清飈
契合終離別歡娛竟寂寥
何如未嫁女獨自守寒宵

端陽十韻

纔應麩賓律驚心景物催
艾隨朱戶上榴近綠尊開
弔屈人何在沉湘事可哀
幾年無賈誼何處有歐回
龍鬪

舟翻雪鬣鳴浪吼雷文章懷往躅歲月等飛埃畫扇逢
時節絺衣稱體裁節從閒裏過詩向醉中來枕簟風生
竹堦除雨潤苔角巾新浴罷高詠興悠哉

投孔原夫十六韻

柱下周時史儒中孔聖孫及今官愈重稽古道猶存吳
越封疆濶東南節制尊繡衣裨日月霜筆贊乾坤八詠
樓增偉雙溪水不渾吏曹愁執法民庶喜霑恩白鷺車
重到青驄馬載犇分當搜杞梓職在進蘭蓀霧隱南山

豹風翔北海鯤賢才難自選憲府更須論賤子非無志
飄蓬豈有根胡能上天闕只合在丘園李愿居盤谷龐
生老鹿門布衣雙短髻茅屋一荒村舊德人皆仰斯文
世所敦烏公禮羅內處士獨慙温

題蜀山圖五十四韻

蠶叢開迹處追舊已茫然霸業依天險王圖度地偏蜀
鄉繁景物秦塞迴人烟邛笮名非一褒斜路幾千堯封
終未徧禹貢豈應全不盡山環遶無窮水接連岷峨相

互屬沱漢共洄泐飛鶴猶難過哀猿尚可緣捫參還歷
井入地忽登天峻坂青泥滑嵌巖碧樹圓一吟三嘆息
十步九歇顛行路難如此傷時益勉旃良工曾夙契繪
事至今傳路始蠶崖入人於鳥道旋錦江元自濶玉壘
為誰堅迤邐瞻眉曲蒼茫憶磬川犍為藏小縣宣化瞰
層巔僧寺隨高下商帆或後先盤渦宜鷺浴枉渚稱鷗
眠鎖水通旁港瀘州帶野壩涪翁亭共仰堡子塞堪憐
南定樓雲矗嘉陵石黛妍平林方葦鬱遠嶂復聯翩黔

水明沙淑鄴山夾市塵載經夔子國多羨武侯賢八陣躬
耕後三分未出前北來愁魏武東下駭孫權猿鳥今蕭
瑟風雲亦渺懸空餘灘漠漠惟有月娟娟工部人千古
成都屋數椽雲安嘗伏枕涪萬不聞鷓屣過瞿唐峽須
乘灩澦船垂堂能弗戒上瀨却勞牽捩拖憑三老攤錢
問長年壯遊雖去邑故隱必歸田步履西郊外移家二
崦邊白鹽疑雪積赤甲與霞褰所值干戈地皆成錦繡
篇江花供句好汀草映袍鮮一老俱云已羣公抑有焉

凝神搜僻壤遊思究殘編高祖炎基肇文翁美化專喧
騰長卿檄寂寞子雲玄躍馬城難恃鳴蛙井易穿赤符
重烜赫白帝謾遷延莫晒姜維閣休誇鄧艾氈英雄基
始創庸闇祚難綿中土名猶正邊夷僭罔悛晉唐初改
轍李孟又摩肩守固寧修德乘危乃慕臙浮雲馳往譽
流水逐前愆草閣秋風老花溪夜雨懸紛紛看翠律歷
歷數潺湲咫尺登臨罷揮毫染素牋

草閣詩集卷四